

**BOSNA I HERCEGOVINA
FEDERACIJA BOSNE I HERCEGOVINE
VLADA**

NACRT

ZAKON

**O SUZBIJANJU ORGANIZIRANIH OBLIKA KRIVIČNIH DJELA KORUPCIJE,
ORGANIZIRANOG KRIMINALA, TERORIZMA I MEĐUKANTONALNOG
KRIMINALA**

Sarajevo, april 2018. godine

**ZAKON
O SUZBIJANJU ORGANIZIRANIH OBLIKA KRIVIČNIH DJELA KORUPCIJE,
ORGANIZIRANOG KRIMINALA, TERORIZMA I MEĐUKANTONALNOG
KRIMINALA**

I. - UVODNE ODREDBE

**Član 1.
(Predmet ovog zakona)**

Ovim zakonom se uređuju:

- a) osnivanje, organizacija, nadležnost i postupanje Posebnog odjela Vrhovnog suda Federacije Bosne i Hercegovine za organizirane oblike krivičnih djela korupcije, organizirani kriminal, terorizam i međukantonalni kriminal (u daljem tekstu: Posebni odjel suda),
- b) osnivanje, organizacija, nadležnost i postupanje Posebnog odjela Federalnog tužilaštva Federacije Bosne i Hercegovine za organizirane oblike krivičnih djela korupcije, organizirani kriminal, terorizam i međukantonalni kriminal (u daljem tekstu: Posebni odjel tužilaštva),
- c) način imenovanja sudija Posebnog odjela suda,
- d) način i uslovi imenovanja Posebnog zamjenika glavnog federalnog tužioca za organizirane oblike krivičnih djela korupcije, organizirani kriminal, terorizam i međukantonalni kriminal (u daljem tekstu: Posebni zamjenik glavnog federalnog tužioca) i način raspoređivanja federalnih tužilaca u Poseban odjel tužilaštva (u daljem tekstu: federalni tužioci), način rukovođenja Posebnim odjelom tužilaštva i rad Posebnog zamjenika glavnog federalnog tužioca i federalnih tužilaca u Posebnom odjelu tužilaštva,
- e) ovlaštenja organizacione jedinice Sudske policije na nivou Federacije Bosne i Hercegovine u vezi sa primjenom ovog zakona,
- f) uslovi i postupak dodjeljivanja i ukidanja statusa saradnika pravosuđa,
- g) finansiranje rada Posebnog odjela suda i Posebnog odjela tužilaštva.

**Član 2.
(Primjena Zakona o krivičnom postupku Federacije Bosne i Hercegovine)**

U postupku za krivična djela iz člana 24. ovog zakona primjenjuje se Zakon o krivičnom postupku Federacije Bosne i Hercegovine (u daljem tekstu Zakon o krivičnom postupku) osim ako ovim zakonom nije drukčije propisano.

**Član 3.
Značenje izraza**

(1) Pojedini izrazi upotrebljeni u ovom zakonu imaju sljedeće značenje:

- a) Organizirani oblici krivičnih djela korupcije su sva krivična djela korupcije učinjena od strane grupe za organizirani kriminal ili organizirane grupe ljudi.
- b) Krivična djela korupcije u smislu tačke a) ovog stava su krivična djela protiv privrede, poslovanja i sigurnosti platnog prometa iz Glave XXII Krivičnog

zakona Federacije Bosne i Hercegovine, (u daljem tekstu: Krivični zakon), krivična djela iz oblasti poreza iz Glave XXIII Krivičnog zakona i krivična djela podmičivanja i krivična djela protiv službene i druge odgovorne dužnosti iz Glave XXXI Krivičnog zakona.

- c) Organizirani kriminal su krivična djela Udruživanje radi činjenja krivičnih djela iz člana 340. Krivičnog zakona i Organizirani kriminal iz člana 342. Krivičnog zakona, uključujući time sva krivična djela koja je učinila grupa za organizirani kriminal, kao i Krivičnim zakonom propisani posebni oblici krivičnih djela Udruživanje radi činjenja krivičnih djela iz člana 340. i Organizirani kriminal iz člana 342. Krivičnog zakona.
- d) Međukantonalni kriminal su krivična djela iz člana 24. stav (1) tač. od a) do c) ovog zakona izvršena ili pokušana na područjima ili na granici dva ili više kantona,
- e) Saradnik pravosuđa je lice kojem je u skladu sa ovim zakonom, Glavni federalni tužilac dao status saradnika pravosuđa, a koja svojim svjedočenjem u krivičnom postupku može znatno doprinijeti otkrivanju i dokazivanju krivičnih djela iz člana 24. ovog zakona.

(2) Drugi izrazi upotrebljeni u ovom zakonu imaju značenje propisano Krivičnim zakonom, Zakonom o krivičnom postupku i Zakonom o sudskoj policiji Federacije Bosne i Hercegovine (u daljem tekstu: Zakon o sudskoj policiji).

(3) Izrazi u ovom zakonu za lica u muškom ili ženskom rodu, upotrebljeni su neutralno i odnose se na muška i ženska lica.

II. - OSNIVANJE, ORGANIZACIJA I NADLEŽNOSTI POSEBNOG ODJELA TUŽILAŠTVA

A. Osnivanje i organizacija Posebnog odjela tužilaštva

Član 4.

(Osnivanje Posebnog odjela tužilaštva)

(1) Ovim zakonom osniva se Posebni odjel tužilaštva.

(2) Posebni odjel tužilaštva je organizaciona jedinica Federalnog tužilaštva Federacije Bosne i Hercegovine.

(3) Sredstva za finansiranje Posebnog odjela tužilaštva planiraju se u okviru sredstava Federalnog tužilaštva Federacije Bosne i Hercegovine koja se osiguravaju u Budžetu Federacije Bosne i Hercegovine.

(4) Posebni odjel tužilaštva se ukida zakonom.

Član 5.

(Primjena Zakona o Federalnom tužilaštvu Federacije Bosne i Hercegovine)

Ako u ovom zakonu nije što drukčije propisano, na organizaciju, nadležnost i djelatnost Posebnog odjela tužilaštva primjenjuju se odredbe Zakona o Federalnom tužilaštvu Federacije Bosne i Hercegovine.

Član 6.

Organizacija rada Posebnog odjela tužilaštva

(1) Posebni odjel tužilaštva čine: Posebni zamjenik glavnog federalnog tužioca i federalni tužioci raspoređeni u Poseban odjel tužilaštva.

(2) Posebni zamjenik glavnog federalnog tužioca i federalni tužioci koji su raspoređeni u Poseban odjel tužilaštva samostalni su i nezavisni u svom radu.

(3) Posebni zamjenik glavnog federalnog tužioca rukovodi Posebnim odjelom tužilaštva i odgovoran je za njegov rad glavnom federalnom tužiocu.

(4) Federalni tužioci koji su raspoređeni u Posebni odjel tužilaštva za svoj rad odgovorni su Posebnom zamjeniku glavnog federalnog tužioca i glavnom federalnom tužiocu.

(5) U slučaju odsutnosti ili spriječenosti posebnog zamjenika glavnog federalnog tužioca, u radu ga zamjenjuje federalni tužilac kojeg odredi glavni federalni tužilac.

B. Nadležnost Posebnog odjela tužilaštva

Član 7.

(Nadležnost Posebnog odjela)

Poseban odjel tužilaštva je nadležan za otkrivanje i gonjenje učinilaca krivičnih djela koja su u nadležnosti Posebnog odjela suda utvrđenih članom 24. stav (1) tač. a) do d) ovog zakona.

C. Način rada Posebnog odjela tužilaštva

Član 8.

(Način rada Posebnog odjela tužilaštva)

(1) Poseban zamjenik glavnog federalnog tužioca, može ako je to potrebno radi vođenja krivičnog postupka za krivična djela iz člana 24. ovog zakona, organizirati posebni istražni tim u čiji sastav mogu ući ovlaštena službena lica iz policijskih organa, Porezne uprave Federacije Bosne i Hercegovine, Finansijske policije Federacije Bosne i Hercegovine, Federalne uprave za inspekcijske poslove, Komisije za vrijednosne papire Federacije Bosne i Hercegovine ili drugog organa uprave i upravnih organizacija u Federaciji Bosne i Hercegovine, u kom smislu će zatražiti od rukovodilaca navedenih organa i organizacija da se tražena službena lica privremeno upute na rad u Poseban odjel tužilaštva.

(2) Rukovodilac organa iz stava (1) ovog člana dužan je bez odlaganja odlučiti o zahtjevu Posebnog zamjenika glavnog federalnog tužioca.

(3) Upućivanje na rad u Poseban odjel tužilaštva iz stava (1) ovog člana vrši se uz saglasnost zaposlenog i traje do okončanja istrage, a najduže godinu dana.

Član 9. (Dužnosti službenih i odgovornih lica)

Ovlaštena službena lica, službena i odgovorna lica u organima uprave, upravnim organizacijama i drugim pravnim licima dužni su da na zahtjev Posebnog zamjenika glavnog federalnog tužioca:

- a) pruže svu neophodnu pomoć i podršku;
- b) bez odgađanja omoguće upotrebu službenih prostorija, opreme i svakog tehničkog sredstva kojim raspolažu;
- c) bez odgađanja predaju Posebnom odjelu tužilaštva svako pismeno ili drugi dokaz koji posjeduju, ili na drugi način saopće informacije koje mogu da pomognu u razjašnjavanju krivičnih djela iz člana 24. ovog zakona.

D. Saradnik pravosuđa

Član 10. (Saradnik pravosuđa)

(1) U cilju efikasnijeg krivičnog gonjenja i dokazivanja krivičnih djela iz člana 24. ovog zakona Posebni zamjenik glavnog federalnog tužioca može od glavnog federalnog tužioca zahtijevati da se određenom licu dodijeli status saradnika pravosuđa.

(2) U svojstvu saradnika pravosuđa se može saslušati kao svjedok lice:

a) protiv kojeg je donesena naredba o provođenju istrage ili je podignuta optužnica za krivična djela iz člana 24. ovog zakona,

b) koje svojim iskazom može znatno doprinijeti otkrivanju i dokazivanju krivičnih djela iz člana 24. ovog zakona.

(3) Zahtjev iz stava (1) ovog člana Posebni zamjenik glavnog federalnog tužioca može podnijeti najkasnije do početka glavnog pretresa protiv lica kojem se daje status saradnika pravosuđa. U slučaju podnošenja tog zahtjeva nakon podizanja optužnice, glavni federalni tužilac je o zahtjevu dužan odlučiti do početka glavnog pretresa i u slučaju dodjeljivanja osumnjičenom, odnosno optuženom statusa saradnika pravosuđa o tome odmah obavijestiti sud.

(4) Glavni federalni tužilac rješenjem odlučuje o zahtjevu iz stava (1) ovog člana na osnovu isprava i drugih dokaza. Protiv tog rješenja žalba nije dozvoljena.

(5) Glavni federalni tužilac će u rješenju kojim dodjeljuje status saradnika pravosuđa navesti da će protiv saradnika pravosuđa biti poduzeto ili nastavljeno krivično gonjenje u skladu sa članom 15. ovog zakona.

(6) Glavni federalni tužilac može u odluci o davanju statusa saradnika pravosuđa navesti da će eventualna šteta licima koju je saradnik pravosuđa prouzrokovao svojim krivičnim djelima biti nadoknađena iz sredstava prikupljenih primjenom posebnog propisa koji uređuje oduzimanje nezakonito stečene imovine u Federaciji Bosne i Hercegovine.

Član 11.

(Drugi slučajevi dodjeljivanja statusa saradnika pravosuđa)

(1) Ukoliko je lice za koje Posebni zamjenik glavnog federalnog tužioca traži status saradnika pravosuđa već pravosnažno osuđeno u drugom krivičnom postupku i nalazi se na izdržavanju kazne, glavni federalni tužilac može tom licu dodijeliti status saradnika pravosuđa radi otkrivanja i dokazivanja krivičnih djela iz člana 24. ovog zakona, uz traženje prethodnog mišljenja suda koji je izrekao pravosnažnu presudu.

(2) Za lice kojem je dodijeljen status saradnika pravosuđa iz stava (1) ovog člana, Posebni zamjenik glavnog federalnog tužioca može Komisiji za uslovni otpust osuđenih lica predložiti donošenje odluke o uslovnom otpustu i prije isteka roka iz člana 45. Krivičnog zakona.

(3) Posebni zamjenik glavnog federalnog tužioca može Federalnom ministarstvu pravde podnijeti inicijativu za prijedlog za pomilovanje lica kojem je dodijeljen status saradnika pravosuđa.

(4) Za lice kojem je dodijeljen status saradnika pravosuđa iz stava (1) ovog člana, Posebni zamjenik glavnog federalnog tužioca može Federalnom ministarstvu pravde podnijeti zahtjev za premještaj osuđenog lica u drugi kazneno-popravni zavod.

(5) Lice iz stava (1) ovog člana kojem je dodijeljen status saradnika pravosuđa može biti uslovno otpuštena, pomilovana ili premještena u drugu kazneno-popravnu ustanovu po odredbama ovog zakona tek nakon što na glavnom pretresu da iskaz u svojstvu svjedoka saradnika pravosuđa u skladu sa članom 15. stav (1) ovog zakona.

Član 12.

(Dužnosti saradnika pravosuđa)

(1) Nakon što se lice iz člana 10. stav (2) ovoga zakona izjasni da će u odnosu na krivična djela iz člana 24. ovoga zakona odgovarati kao svjedok i na pitanja iako bi ga istinit odgovor izložio krivičnom gonjenju, Posebni zamjenik glavnog federalnog tužioca će pribaviti pisanu izjavu kojom se to lice obavezuje:

a) da će kao svjedok u krivičnom postupku govoriti istinu i da neće ništa što mu je poznato o krivičnom djelu i njegovu učiniocu prešutjeti,

b) da će kao svjedok u krivičnom postupku iskazivati istinu i da neće ništa što mu je

poznato o drugom krivičnom djelu iz člana 24. ovog zakona i njegovu učiniocu prešutjeti,

c) da će kao svjedok u krivičnom postupku iskazivati istinu, da ništa neće prešutjeti o djelu i učiniocu o kojima svjedoči i da ništa što mu je poznato o pribavljenoj imovinskoj ili drugoj koristi ili prihodu, predmetima, pribavljenoj imovini ili drugoj okolnosti u vezi s krivičnim djelima iz člana 24. ovoga zakona neće prešutjeti.

(2) Nakon dodjeljivanja licu statusa saradnika pravosuđa Posebni zamjenik glavnog federalnog tužioca će iz spisa predmeta izdvojiti zapisnike o njezinim ranijim iskazima koje je dala u svojstvu osumnjičenog. Nakon dostavljanja optužnice sudu, po prijemu obavještenja o dodjeljivanju osumnjičenom odnosno optuženom statusa saradnika pravosuđa, to izdvajanje će izvršiti sudija za prethodno saslušanje. Izdvojene izjave se ne mogu koristiti kao dokaz u krivičnom postupku, izuzev u slučajevima predviđenim u članu 15. ovog zakona.

(3) Nakon što glavni federalni tužilac licu iz stava (2) ovog člana dodijeli status saradnika pravosuđa, tužilac Posebnog odjela tužilaštva će saslušati to lice u svojstvu svjedoka i o tome sačiniti zapisnik koji se može koristiti kao dokaz na glavnoj raspravi u skladu sa Zakonom o krivičnom postupku i sa Zakonom o zaštiti svjedoka pod prijetnjom i ugroženih svjedoka.

Član 13.

(Lica kojima se ne može dodijeliti status saradnika pravosuđa)

Ne može imati status saradnika pravosuđa lice koje je:

a) osumnjičeno ili optuženo da je učinilo krivična djela ubistva iz člana 166. Krivičnog zakona, terorizma iz člana 201. Krivičnog zakona, uzimanja talaca iz člana 200. stav (2) Krivičnog zakona, silovanja iz člana 203. Krivičnog zakona, spolnog odnosa s nemoćnim licem iz člana 204. Krivičnog zakona ili spolnog odnosa s djetetom iz člana 207. Krivičnog zakona,

b) organizator grupe za organizirani kriminal ili organizirane grupe ljudi ako se radi o krivičnim djelima korupcije,

c) podstrekač na učinjenje krivičnog djela iz člana 24. ovoga zakona u cilju da protiv potaknutog lica bude pokrenut postupak za to djelo.

Član 14.

(Mjere zaštite)

Prilikom ispitivanja saradnika pravosuđa kao svjedoka na glavnom pretresu primjenjuju se mjere zaštite svjedoka u skladu sa Zakonom o krivičnom postupku i Zakonom o zaštiti svjedoka pod prijetnjom i ugroženih svjedoka.

Član 15.

(Ukidanje statusa saradnika pravosuđa)

(1) Posebni zamjenik glavnog federalnog tužioca će zatražiti od glavnog federalnog tužioca da ukine status saradniku pravosuđa, radi nastavka ili pokretanja krivičnog postupka:

- a) ako saradnik pravosuđa nije iznio sve činjenice i okolnosti iz člana 12. ovoga zakona ili je dao lažni iskaz,
- b) ako saradnik pravosuđa prije pravosnažnog okončanja krivičnog postupka učini novo krivično djelo iz člana 24. ovoga zakona,
- c) ako je saradnik pravosuđa u roku dvije godine nakon dobijanja tog statusa učinio krivično djelo iz člana 24. ovoga zakona.

(2) Saradnik pravosuđa koji je dao iskaz na način propisan članom 12. ovog zakona ne može se krivično goniti za krivično djelo iz člana 24. ovog zakona.

Član 16. **(Mjere zaštite van krivičnog postupka)**

Mjere zaštite saradnika pravosuđa i njemu bliskih lica van krivičnog postupka provode se prema posebnim propisima.

E. Imenovanje Posebnog zamjenika glavnog federalnog tužioca i raspoređivanje federalnih tužilaca u Posebni odjel tužilaštva

Član 17. **(Imenovanje posebnog zamjenika glavnog federalnog tužioca)**

(1) Posebni zamjenik glavnog federalnog tužioca imenuje se i razrješava u skladu sa Zakonom o Visokom sudskom i tužilačkom vijeću Bosne i Hercegovine pod uslovima koji su određeni za imenovanje i razrješenje zamjenika glavnog federalnog tužioca.

(2) Glavni federalni tužilac inicira postupak imenovanja Posebnog zamjenika glavnog federalnog tužioca najkasnije tri mjeseca prije isteka perioda na koji je imenovan Posebni zamjenik glavnog federalnog tužioca.

(3) Glavni federalni tužilac, na prijedlog Posebnog zamjenika glavnog federalnog tužioca i u skladu sa Pravilnikom o unutrašnjoj organizaciji i sistematizaciji Federalnog tužilaštva Federacije Bosne i Hercegovine, raspoređuje određeni broj federalnih tužilaca u Posebni odjel tužilaštva.

(4) Glavni federalni tužilac, u skladu sa potrebama rada Federalnog tužilaštva Federacije Bosne i Hercegovine, može rasporediti federalne tužioce u Posebni odjel tužilaštva i iz Posebnog odjela tužilaštva.

Član 18. **(Privremeno upućivanje na rad u Posebni odjel tužilaštva)**

(1) Zamjenik glavnog kantonalnog tužioca ili kantonalni tužilac mogu i bez svog pristanka biti privremeno upućeni na rad u određenom predmetu u Posebni odjel tužilaštva, na period od najviše godinu dana.

(2) Odluku o privremenom upućivanju u Posebni odjel tužilaštva donosi glavni federalni tužilac, na zahtjev Posebnog zamjenika glavnog federalnog tužioca, i o tome shodno obavještava Visoko sudsko i tužilačko vijeće Bosne i Hercegovine.

(3) U slučaju iz stava (1) ovog člana zamjenik glavnog kantonalnog tužioca ili kantonalni tužilac ima pravo na plaću i druge naknade tužioca u Posebnom odjelu, kao i druge naknade u skladu sa zakonom.

Član 19. (Stručni saradnici i istražioc i u Posebnom odjelu tužilaštva)

(1) U postupku prijema u radni odnos u Posebni odjel tužilaštva, stručni saradnici, istražioc i tužilaštva, drugi državni službenici i namještenici daju izjavu o imovini koju posjeduju ili kojom raspoložu putem imovinskog kartona, kao i izjavu kojom pristaju na sigurnosne provjere.

(2) Stručni saradnici i istražioc i tužilaštva u Posebnom odjelu tužilaštva pomažu tužiocima u radu na predmetima u kojima su potrebna posebna znanja, a mogu i samostalno obavljati poslove kad je to određeno zakonom ili drugim propisom.

(3) Istražioc i tužilaštva kao stručnog lica kriminalističke, pravne, ekonomske, informatičke i druge struke postupaju na osnovu naloga Posebnog zamjenika glavnog federalnog tužioca ili federalnog tužioca u Posebnom odjelu tužilaštva u radu na pojedinim predmetima.

(4) Broj istražilaca tužilaštva, uslovi za njihov prijem u radni odnos i prestanak radnog odnosa u Posebnom odjelu tužilaštva uredit će se Pravilnikom o unutrašnjoj organizaciji Federalnog tužilaštva Federacije Bosne i Hercegovine.

III. POSEBNI ODJEL SUDA

A. Osnivanje i organizacija Posebnog odjela suda

Član 20. (Osnivanje Posebnog odjela suda)

(1) Ovim zakonom osniva se Posebni odjel suda.

(2) Posebni odjel suda je organizaciona jedinica Vrhovnog suda Federacije Bosne i Hercegovine.

(3) Sredstva za finansiranje Posebnog odjela suda planiraju se u okviru sredstava Vrhovnog suda Federacije Bosne i Hercegovine koja se osiguravaju u Budžetu Federacije Bosne i Hercegovine.

(4) Posebni odjel suda se ukida zakonom.

Član 21. (Primjena Zakona o sudovima u Federaciji Bosne i Hercegovine)

Ako u ovom zakonu nije što drukčije propisano, na organizaciju, nadležnost i djelatnost Posebnog odjela suda primjenjuju se odredbe Zakona o sudovima u Federaciji Bosne i Hercegovine.

Član 22.

(Imenovanje sudija i organizacija rada Posebnog odjela suda)

(1) Na prijedlog Vrhovnog suda Federacije Bosne i Hercegovine Visoko sudsko i tužilačko vijeće Bosne i Hercegovine utvrđuje broj sudija i imenuje sudije u Poseban odjel suda.

(2) Predsjednika Posebnog odjela suda imenuje predsjednik Vrhovnog suda Federacije Bosne i Hercegovine iz reda sudija tog odjela u skladu sa Pravilnikom o unutrašnjoj organizaciji Vrhovnog suda Federacije Bosne i Hercegovine.

(3) Predsjednik Posebnog odjela suda rukovodi Posebnim odjelom suda.

(4) U slučaju odsutnosti ili spriječenosti predsjednika Posebnog odjela suda, u radu ga zamjenjuje sudija Posebnog odjela suda kojeg odredi predsjednik Vrhovnog suda Federacije Bosne i Hercegovine.

(5) U Posebnom odjelu suda mogu raditi samo sudije koje su imenovane u taj odjel. Sudija Posebnog odjela suda ne može učestvovati u radu ostalih odjeljenja Vrhovnog suda Federacije Bosne i Hercegovine.

Član 23.

(Stručni saradnici i stručni savjetnici)

(1) U Poseban odjel suda postavljaju se stručni saradnici.

(2) Broj stručnih saradnika i broj stručnih savjetnika iz stava (1) ovog člana i uslovi za njihovo postavljanje uređuju se Pravilnikom o unutrašnjoj organizaciji i sistematizaciji radnih mjesta u Vrhovnom sudu Federacije Bosne i Hercegovine.

B. Nadležnost Posebnog odjela suda

Član 24.

(Nadležnost Posebnog odjela suda)

(1) Posebni odjel suda je stvarno i mjesno nadležan za:

- a) krivična djela terorizma iz Glave XVIII Krivičnog zakona,
- b) krivična djela Udruživanje radi činjenja krivičnih djela iz člana 340. Krivičnog zakona i Organizirani kriminal iz člana 342. Krivičnog zakona, uključujući time sva krivična djela koja je učinila grupa za organizirani kriminal, kao i za Krivičnim zakonom propisane posebne oblike krivičnih djela Udruživanje radi činjenja krivičnih djela iz člana 340. Krivičnog zakona i Organizirani kriminal iz člana 342. Krivičnog zakona,
- c) krivična djela korupcije iz člana 3. stav (1) tačka b) ovog zakona učinjena od strane grupe za organizirani kriminal ili organizirane grupe ljudi,
- d) međukantonalni kriminal.

(2) Ovaj zakon će se primjenjivati i u odnosu na druga krivična djela koja su učinjena u sticaju sa krivičnim djelima iz stava (1) ovog člana kada u skladu sa

odredbama Zakona o krivičnom postupku postoje uslovi za spajanje postupka i vođenje jedinstvenog postupka.

C. Način rada Posebnog odjela suda

Član 25.
(Odlučivanje o prijedlogu za određivanje pritvora)

Sudija za prethodni postupak Posebnog odjela suda će odmah a najkasnije u roku od 48 sati donijeti odluku o prijedlogu za određivanje pritvora.

Član 26.
(Postupanje po žalbi)

(1) Na odlučivanja o žalbama izjavljenim protiv rješenja Posebnog odjela suda shodno će se primjenjivati odredbe Zakona o krivičnom postupku o žalbi na rješenje.

(2) U slučajevima kada je Zakonom o krivičnom postupku propisano da o žalbi protiv rješenja donesenog u prvom stepenu odlučuje vijeće žalbenog odjeljenja višeg suda, o takvoj žalbi protiv rješenja Posebnog odjela suda odlučuje vijeće Krivičnog odjeljenja Vrhovnog suda Federacije Bosne i Hercegovine.

(3) O žalbama izjavljenim protiv presude Posebnog odjela suda odlučuje vijeće Krivičnog odjeljenja Vrhovnog suda Federacije Bosne i Hercegovine.

(4) Mjera pritvora koju je odredio Posebni odjel suda izvršit će se u pritvorskim jednicama kazneno-popravnih zavoda u Federaciji Bosne i Hercegovine.

(5) Troškovi provođenja mjere pritvora po odluci Posebnog odjela suda padaju na teret Budžeta Federacije Bosne i Hercegovine.

IV. - NADLEŽNOSTI I ZADACI SUDSKE POLICIJE FEDERACIJE BOSNE I HERCEGOVINE

Član 27.
(Nadležnost Sudske policije Federacije Bosne i Hercegovine)

(1) Neposrednu pomoć u radu Posebnog odjela suda i Posebnog odjela tužilaštva pruža Sudska policija Federacije Bosne i Hercegovine (u daljem tekstu: Sudska policija) u skladu sa zakonom.

(2) Pomoć iz stava (1) ovog člana se odnosi na sljedeće poslove:

- a) osiguranje informacija;
- b) dovođenje osumnjičenih, optuženih lica, svjedoka i vještaka;
- c) lišenje slobode osuđenih lica i lica kojima je određena mjera pritvora;
- d) sprovođenje lica lišenih slobode;
- e) zadržavanje lica lišenih slobode;
- f) provođenje izvršenja sudskih odluka;
- g) fizička i tehnička zaštita objekata i imovine;

- h) održavanje reda u sudnicama i drugim prostorijama ili prostorima kojim se osigurava uspješnost vođenja odgovarajućeg postupka;
- i) fizička i tehnička zaštita sudija i tužilaca, drugih zaposlenika, njihove imovine i članova uže porodice, ukoliko je njihova sigurnost ugrožena i u skladu sa stručnom procjenom Sudske policije;
- j) zaštita svjedoka kojim je određen status u skladu sa odredbama važećeg zakona o zaštiti svjedoka pod prijetnjom i ugroženih svjedoka i odredbama ovog zakona;
- k) izvršavanje drugih naloga Posebnog odjela suda i Posebnog odjela tužilaštva kojim se osigurava uspješno vođenje odgovarajućeg postupka.

(3) Policijski organi, organi uprave, upravne organizacije i druga tijela su dužni pružiti pomoć Sudskoj policiji pri izvršavanju zadataka iz stava (2) ovog člana.

Član 28. (Izvršenje poslova i ovlaštenja Sudske policije)

(1) Poslove iz člana 27. ovog zakona provodit će organizaciona jedinica Sudske policije organizirana na nivou Federacije Bosne i Hercegovine, koja za slučaj potrebe može zahtijevati pomoć organizacionih jedinica Sudske policije u kantonima.

(2) Službenici Sudske policije raspoređeni u organizacionoj jedinici iz stava (1) ovog člana i drugi službenici Sudske policije koji se angažiraju na neposrednim izvršenjima poslova za Posebni odjel suda i Posebni odjel tužilaštva dužni su dati izjavu o imovini koju posjeduju ili njome raspoložu i izjavu kojom pristaju na sigurnosne provjere.

V. - SREDSTVA ZA RAD

Član 29. (Sredstva za rad)

(1) Sredstva za rad Posebnog odjela tužilaštva i Posebnog odjela suda i sredstva za posebne namjene Posebnog odjela tužilaštva osiguravaju se u Budžetu Federacije Bosne i Hercegovine.

(2) Sredstva za posebne namjene u Posebnom odjelu tužilaštva se mogu koristiti i za funkcioniranje blagajne za posebne operativne poslove i posebne istražne radnje u Posebnom odjelu tužilaštva, čije korištenje će se urediti posebnim propisom koji donosi glavni federalni tužilac, na prijedlog Posebnog zamjenika glavnog federalnog tužioca.

Član 30. (Plaće i naknade)

(1) Federalni tužioci Posebnog odjela tužilaštva i sudije Posebnog odjela suda imaju pravo na plaću i naknade u skladu sa odredbama Zakona o plaćama i drugim naknadama sudija i tužilaca u Federaciji Bosne i Hercegovine, te pravo na posebni dodatak na osnovu složenosti i rizika poslova u iznosu 10% od njihove plaće.

(2) Sudije Krivičnog odjeljenja Vrhovnog suda Federacije Bosne i Hercegovine koje

odlučuju o žalbama na odluke Posebnog odjela suda imaju pravo na posebni dodatak na osnovu složenosti i rizika poslova u iznosu 15% od njihove plaće.

(3) Za vrijeme rada u Posebnom odjelu tužilaštva upućeno lice ima pravo na plaću u visini koju ima zaposleni na istim poslovima u Posebnom odjelu tužilaštva ili u visini njene plaće koju je imala na radnom mjestu sa kojeg je upućena ukoliko je to za nju povoljnije, kao i druge naknade u skladu sa zakonom.

VI. - PRIJELAZNE I ZAVRŠNE ODREDBE

Član 31. (Donošenje podzakonskih propisa)

(1) Visoko sudsko i tužilačko vijeće Bosne i Hercegovine će u roku 60 dana od dana stupanja na snagu ovog zakona utvrditi broj sudija Vrhovnog suda Federacije Bosne i Hercegovine i broj tužilaca Federalnog tužilaštva Federacije Bosne i Hercegovine u skladu sa potrebama Posebnog odjela suda i Posebnog odjela tužilaštva.

(2) Predsjednik Vrhovnog suda Federacije Bosne i Hercegovine i glavni federalni tužilac će u roku 60 dana od dana stupanja na snagu ovog zakona donijeti, odnosno uskladiti pravilnike o unutrašnjoj organizaciji i sistematizaciji i druge pravilnike potrebne za početak rada i funkcioniranje Posebnog odjela suda i Posebnog odjela tužilaštva.

(3) Visoko sudsko i tužilačko vijeće Bosne i Hercegovine će provesti proceduru imenovanja posebnog zamjenika glavnog federalnog tužioca, određenog broja federalnih tužilaca i sudija Posebnog odjela suda, nakon stupanja na snagu ovog zakona, a prije početka njegove primjene.

(4) Glavni federalni tužilac će izvršiti raspoređivanje tužilaca u Posebni odjel tužilaštva sa danom početka primjene ovog zakona.

(5) Glavni federalni tužilac će u roku 30 dana od dana stupanja na snagu ovog zakona donijeti pravilnik iz člana 29. stav (2) ovog zakona.

Član 32. (Usklađivanje podzakonskih akata)

(1) Federalno ministarstvo pravde uskladit će svoje podzakonske akte o davanju prijedloga za pomilovanja u skladu sa članom 11. stav (3) ovog zakona u roku 60 dana od dana stupanja na snagu ovog zakona.

(2) Komisija za pomilovanje osuđenih lica pri Federalnom ministarstvu pravde uskladit će poslovnik o svom radu u skladu sa članom 11. stav (3) ovog zakona u roku 60 dana od dana stupanja na snagu ovog zakona.

Član 33. (Popunjavanje radnih mjesta)

Popunjavanje potrebnih radnih mjesta državnih službenika i namještenika u Posebnom odjelu tužilaštva i Posebnom odjelu suda će se izvršiti u roku od četiri mjeseca od dana stupanja na snagu ovog zakona.

Član 34.
(Primjena Zakona)

Krivični postupci u kojima su do dana početka primjene ovog zakona podignute optužnice za krivična djela iz nadležnosti Posebnog odjela suda, okončat će se pred sudovima koji su bili stvarno i mjesno nadležni za ta krivična djela prije početka primjene ovog zakona.

Član 35.
(Prestanak važenja)

Početak primjene ovog zakona prestaje da važi Zakon o suzbijanju korupcije i organiziranog kriminala u Federaciji Bosne i Hercegovine („Službene novine Federacije BiH“, broj 59/14).

Član 36.
(Stupanje na snagu)

Ovaj zakon stupa na snagu osmog dana od dana objavljivanja u "Službenim novinama Federacije BiH", a početak će se primjenjivati nakon šest mjeseci od dana njegovog stupanja na snagu.

O B R A Z L O Ž E N J E

ZAKONA O SUZBIJANJU ORGANIZIRANIH OBLIKA KRIVIČNIH DJELA KORUPCIJE, ORGANIZIRANOG KRIMINALA, TERORIZMA I MEĐUKANTONALNOG KRIMINALA

I. – USTAVNI OSNOV

Ustavnopravni osnov za donošenje ovog zakona sadržan je u odredbi člana IV.A.20. (1) d) Ustava Federacije Bosne i Hercegovine, kojim je propisano, da je Parlament Federacije Bosne i Hercegovine nadležan za donošenje Zakona o vršenju funkcije federalne vlasti, kao i odredba člana III.1.d) Ustava Federacije Bosne i Hercegovine kojom je propisano da su u isključivoj nadležnosti Federacije suzbijanje terorizma, međukantonalnog kriminala, neovlaštene trgovine drugom i organiziranog kriminala. Kao ustavni osnov navodimo i odredbu člana IV.C.4. član 15. stav 2. kojim je propisano da Vrhovni sud Federacije BiH ima i izvorne nadležnosti utvrđene federalnim zakonima.

II. – RAZLOZI ZA DONOŠENJE ZAKONA

Osnovni razlog za donošenje ovog zakona jeste stvaranje neophodnih institucionalnih pretpostavki za efikasnije suzbijanje organiziranih oblika krivičnih djela korupcije, organiziranog kriminala, terorizma i međukantonalnog kriminala.

Ovim zakonom uspostavljaju se posebni odjeli Vrhovnog suda Federacije BiH i Federalnog tužilaštva Federacije Bosne i Hercegovine koji bi bili stvarno i mjesno nadležni na teritoriji Federacije Bosne i Hercegovine u vršenju funkcija krivičnog progona i suđenja navedenih krivičnih djela. Dakle, ovim zakonskim nacrtom stvaraju se institucionalni mehanizmi za borbu protiv navedenih društveno opasnih pojava.

Federalni ministar pravde formirao je Radnu grupu čiji je zadatak bio izvršiti analizu aktuelnog Zakona o suzbijanju korupcije i organiziranog kriminala u Federaciji Bosne i Hercegovine („Službene novine Federacije BiH“, broj 59/14). Radnu grupu činili su predstavnici Pravnog fakulteta u Sarajevu, Vrhovnog suda Federacije BiH, Federalnog tužilaštva Federacije BiH i Federalnog ministarstva pravde. Radna grupa izvršila je sveobuhvatnu analizu predmetnog zakonskog propisa, te je kao rezultat rada ove radne grupe izrađen prednacrt ovog zakona.

III. – OBRAZLOŽENJE POJEDINIH ZAKONSKIH RJEŠENJA

U uvodnim odredbama ovog zakonskog nacrta uređuju se: osnivanje, organizacija, nadležnost i postupanje posebnih odjela Vrhovnog suda Federacije BiH i Federalnog tužilaštva Federacije BiH. Uvodne odredbe ovog nacrta definiraju

predmet ovog zakona, primjenu Zakona o krivičnom postupku Federacije Bosne i Hercegovine, kao i značenje izraza upotrebljenih u ovom zakonu.

U Poglavlju Zakona pod nazivom „Osnivanje, organizacija i nadležnost Posebnog odjela tužilaštva“. Predmetnim odredbama propisano je da je Posebni odjel tužilaštva unutrašnja organizaciona jedinica Federalnog tužilaštva, te da ovaj posebni odjel čine Posebni zamjenik glavnog federalnog tužioca i federalni tužioci raspoređeni u Posebni odjel tužilaštva. Predmetne odredbe također propisuju nadležnost i način rada Posebnog odjela tužilaštva, dužnosti službenih i odgovornih lica, kao i detaljne odredbe o dodjeljivanju statusa saradnika pravosuđa, njegovih dužnosti, kao i propisivanje jasne odredbe kojim licima se ne može dodijeliti status saradnika pravosuđa. Ovo poglavlje nacrta jasno definiira postupak i uslove za ukidanje statusa saradnika pravosuđa. Jasno je propisana i procedura imenovanje Posebnog zamjenika glavnog federalnog tužioca, te je propisano da se Posebni zamjenik glavnog federalnog tužioca imenuje i razrješava u skladu sa Zakonom o Visokom sudskom i tužilačkom vijeću Bosne i Hercegovine pod uslovima koji su određeni za imenovanje i razrješenje zamjenika glavnog federalnog tužioca. Nacrtom se također propisuje mogućnost da zamjenik glavnog kantonalnog tužioca ili kantonalni tužilac mogu i bez svog pristanka biti privremeno upućeni na rad u određenom predmetu u Posebni odjel tužilaštva.

U Poglavlju pod rednim brojem III propisuje se osnivanje Posebnog odjela suda na način da je isti unutrašnja organizaciona jedinica Vrhovnog suda Federacije BiH. Također je jasno propisana nadležnost Posebnog odjela suda i to odredbom člana 24. Ovo poglavlje nacrta sadrži i odredbe o odlučivanju o prijedlogu za određivanje pritvora i postupanje po žalbi.

U Poglavlju pod rednim brojem IV propisana je nadležnost Sudske policije u skladu sa odredbama ovoga zakona kao i izvršenje poslova i ovlaštenja Sudske policije.

Poglavlje pod rednim brojem V sadrži odredbe kojima se propisuju sredstva za rad i plaće i naknade. Odredbom člana 29. stav 1. propisano je da sredstva za rad Posebnih odjela suda i tužilaštva, kao i sredstva za posebne namjene Posebnog odjela tužilaštva osiguravaju se Budžetom Federacije Bosne i Hercegovine.

Poglavlje pod rednim brojem VI sadrži prijelazne i završne odredbe ovoga zakona.

IV. – FINANSIJSKA SREDSTVA

Za provođenje ovog zakona nije potrebno osigurati dodatna finansijska sredstva iz Budžeta Federacije Bosne i Hercegovine.